

**2015 Rhif 1499 (Cy. 171)**

**GOFAL CYMDEITHASOL,  
CYMRU**

**Rheoliadau Gofal a Chymorth  
(Preswylfa Arferol) (Llety  
Penodedig) (Cymru) 2015**

**NODYN ESBONIADOL**

*(Nid yw'r nodyn hwn yn rhan o'r Rheoliadau)*

Mae adran 194 o Ddeddf Gwasanaethau Cymdeithasol a Llesiant (Cymru) 2014 ("y Ddeddf") yn gwneud darpariaeth ar gyfer cadarnhau preswylfa arferol person. Mae adran 194(1) yn gwneud darpariaeth ynghylch preswylfa arferol oedolyn mewn achos pan fo'n byw mewn llety o fath penodedig.

Pan fo gan oedolyn anghenion am ofal a chymorth na ellir eu diwallu ond drwy fyw mewn llety o fath penodedig a'i fod yn byw mewn llety o fath penodedig yng Nghymru, mae'r oedolyn i'w drin (yn rhinwedd adran 194(1) o'r Ddeddf) fel un sy'n preswylfio fel arfer yn yr ardal lle'r oedd yn preswylfio fel arfer yn union cyn iddo ddechrau byw yn y math penodedig o lety. Os oedd yr oedolyn heb breswylfa sefydlog yn union cyn iddo ddechrau byw mewn llety o fath penodedig, mae'r oedolyn i'w drin fel un sy'n preswylfio fel arfer yn yr ardal lle'r oedd yn bresennol bryd hynny.

Mae'r Rheoliadau hyn yn darparu bod llety cartref gofal yn llety o fath penodedig at ddibenion adran 194(1) o'r Ddeddf.

**2015 Rhif 1499 (Cy. 171)**

**GOFAL CYMDEITHASOL,  
CYMRU**

**Rheoliadau Gofal a Chymorth  
(Preswylfa Arferol) (Llety  
Penodedig) (Cymru) 2015**

*Gwnaed* 7 Gorffennaf 2015

*Gosodwyd gerbron Cynulliad Cenedlaethol  
Cymru* 10 Gorffennaf 2015

*Yn dod i rym* 6 Ebrill 2016

Mae Gweinidogion Cymru, drwy arfer y pwerau a roddwyd gan adran 194(1) o Ddeddf Gwasanaethau Cymdeithasol a Llesiant (Cymru) 2014(1), yn gwneud y Rheoliadau a ganlyn:

**Enwi, cychwyn, cymhwyso a dehongli**

1.—(1) Enw'r Rheoliadau hyn yw Rheoliadau Gofal a Chymorth (Preswylfa Arferol) (Llety Penodedig) (Cymru) 2015.

(2) Daw'r Rheoliadau hyn i rym ar 6 Ebrill 2016 ac maent yn gymwys o ran Cymru.

(3) Yn y Rheoliadau hyn—

ystyr “y Ddeddf” (*“the Act”*) yw Deddf Gwasanaethau Cymdeithasol a Llesiant (Cymru) 2014;

ystyr “llety cartref gofal” (*“care home accommodation”*) yw llety mewn cartref gofal o fewn yr ystyr a roddir i “*care home*” gan adran 3 o Ddeddf Safonau Gofal 2000(2).

---

(1) 2014 dccc 4.  
(2) 2000 p. 14; diwygiwyd adran 3 gan Ddeddf Iechyd a Gofal Cymdeithasol 2008 (p. 14), adran 95 a pharagraff 4 o Atodlen 5.

## **Mathau penodedig o lety**

2.—(1) At ddibenion adran 194(1) o'r Ddeddf (preswylfa arferol), mae llety cartref gofal yn llety o fath penodedig.

*Mark Drakeford*

Y Gweinidog Iechyd a Gwasanaethau Cymdeithasol,  
un o Weinidogion Cymru  
7 Gorffennaf 2015